


ALAROBIA - LAVENONA - TAONA D 2025



Ny Rainao izay mahita ny miafina no hamaly soa anao.

Ry Kristianina havana, amin'izao Alarobia fanosorana ny lavenona izao no hanombohantsika ny vaninandro manokana hiomanantsika sy hivelomantsika ny misterin'ny famonjena antsika mitondra antsika amin'ny fankalazana ny Paka. Fotoana izay hamakivakiansika mandritra ny 40 andro ny karemy handalinana ny finoantsika, katolika aho ka halaliniko izay inoako. Marina ny vanim-potoana rehetra amin'izao taon-jobily izao dia tena sarobidy avokoa fa izao KAREMY 2025 dia tena manokana tokoa satria mampiditra antsika amin'izao taon-jobilin'ny famonjenantsika. Mampirisika antsika àry hivelona ny Karemy. Hiezaka hanaraka tsara ireo

hafatra sy fanentanana hanampy antsika hiroso lalindalina. Fitaovana atolotra ho antsika ny Sinaody. Matetika aho ny milaza tsy misy kisendrasendra ao amin'Andriamanitra. Sambatra isika eto amin'ny diosezy afaka mandinika ny fiainan'ny fiaraha-monina bebe kokoa amin'izao karemy izao. Manainga antsika jiaby

hikatroka bebe kokoa eo anivon'ny dinika rehetra ataontsika.

Hiverenantsika aloha ny Tenin'Andriamanitra sy izao alarobian'ny lavenona izao. Ny isa 40 dia fiombonantsika amin'ilay 40 taona namakivakian'ny vahoakan'Israely ny tany efitra, "désert" tany karankaina mampatahotra satria tsy fantatra izay hiafarana, faritra anjakan' ny hainandro tsy misy rano ka manjary mahita zavatra maro tsy tokony ho hita ny fandalovana azy, maro ny fakam-panahy sedraina. Nandritra ny 40 andro ihany koa no nosedrain'I Jesoa alohan'ny hanombohany ny fitoriany ny vaovao mahafaly ireo fakam-panahy maro samihafa nanjo azy. Isika koa mandritra ny 40 andro ny karemy izao hiezaka haka tahaka an'i Jesoa, haka tahaka ireo vahoakan'Andriamanitra ka antenaintsika ho tafita isika satria izany no misterin'ny Paka izany hoe fandalovana : miala amin'ny fiainana tsizarizary any an'efitra ambaran'ny sedra sy fakam-panahy ka miroso amin'ny fiainam-baovao. Manantitrantitra amintsika fa ny fankalazana tsy hoe fahatsiarovana fotsiny fa fivelomana, fiainana an'izay niainan'I Jesoa, izany

Vakiteny I : Joely 2, 12-18

Tononkira : Sal. 50,

Vakiteny II : 2 Kôr. 5, 20-6, 2

Evanjely : Mt. 6, 1-6, 16-18

no maha-Katolika Kristianina antsika, hiainantsika izay inoantsika, Katolika aho ka mankalaza izay inoako.

Ny 40 andro hidirantsika amin'izao Alarobia fanosorana lavenona izao dia tandindon'ny fahalevonana toetrantsika olombelona misy fetra izany no dikan'ny lavenona. Ilay sampankazo nentina hiderana an'Andriamanitra tamin'ny fankalazana ny Alahadin'ny sampakazo no nangonina ka nodorana ireny sampankazo ireny, levona izy ireny avy amin'izany no nahatonga ny teny lavenona. Ho levona koa isika manambara fa olona voafetra isika ary indrindra noho ny fahotana tamin'ny fototra izay nitondra amin'ny fahafatesana.

Hosorana antsika io lavenona io ka lazaina amin'izany hoe “Mibebaha ary minoà ny evanjely”, izany no lalan-kombàna hizerantsika hamakivaky izao 40 andro izao, hibebaka ary ny fibebahana dia amin'ny alalan'ny tenin'Andriamanitra. Tamin'ny Alahady lasa teo mbola nandalina mikasika ny teny isika, ny tenin'Andriamanitra no hanilo antsika amin'izao 40 andro entintsika mamakivaky ny efity ny fiainantsika izao izany hoe ireo fakam-panahy maro ho folahintsika, ho levonintsika miaraka amin'ny fahasoavan'Andriamanitra. Aoka hazava ny sedra tsy ara-panahy fotsiny fa araka ny fakam-panahy nanjo an'i Jesoa dia mety ara-nofo, aratsaina, ara-panahy... Izany no henontsika ao amin'ny Evanjely raha mampifandray ny vavaka sy ny fifadian-kanina ary ny asa fanehoam-pitivana i Jesoa.

Izany no mahatonga an'i Joely mpaminany milaza ao amin'ny vakiteny voalohany boe *“ny fonareo no rovirovito fa tsy ny fitafianareo”*. Ezaka voalohany ataontsika amin'izao famakivakiana ny 40 andro izao dia tsy ny avy ety ivelany no hovaintsika fa ny fontsika mila miova ny fontsika izany hoe ireo “encombrements” izay misakana antsika tsy hiroso amin'ny tena fiainana maha zanak'Andriamanitra izay antenaintsika amin'ny Paka mitondra antsika amin'ny fitsanganan-ko velona. Izany no maha Eglizy Olona Velona antsika ka tsy maintsy esorintsika ao am-pontsika ao ny ratsy rehetra ka ho fo vaovao no entintsika mankalaza ny Paka, izany no atao hoe fibebahana.

Ary vokatry ny fihainoantsika ny tenin'Andriamanitra no hahafahantsika miaina an'izany. Lazain'ny pretra rehefa manosotra lavenona amin'ny handrintsika izy dia ny hoe “mibebaha ka minoà ny evanjely”. Ilezahantsika hampiharina amin'ny fiainantsika andavanandro izany famolahana ny fontsika izany mba ho fo vaovao. Anarin'i Jesoa isika ao amin'ny evanjely, *“Ny rainareo mahita ao amin'ny miafina no hamaly soa anareo”*. Mametraka sy manambara fandaharam-potoana ho antsika ny evanjely amin'izao fanombohantsika ny karemy izao :

Manasa antsika hiova amin'ny alalan'ny asa fanasoavana hanehoantsika fa miova ny fontsika. Manasa antsika hiova amin'ny alalan'ny vavaka, amin'ny alalan'ny fifamelan-keloka hanambarantsika fa miova ny fontsika ka ny fifadian-kanina ataontsika dia fifadiana amin'ny fahotana. Marina tsara ny mamerina fa ilaina ny fifadian-kanina satria misy ny milaza amin'izao fa efa lany andro, misy milaza fa diso aza, sanatria tsy miova ny fampianaran'ny Eglizy momba izany. Ilaintsika ny mamolaka ny vatana mba ho folaka ny vatana sy ny saina ka ilaina koa ny fifadian-kanina mba hanambarantsika fa miezaka mamolaka ny saina koa isika. Amin'ny

fotoanan'ny karemy tahaka izao no hanaovana ny fifadian-kanina ary ataontsika ao anatin'ny fahanginana, ny fontsika no tadiavina hiova fa tsy zavatra ety ivelany fotsiny. Tsy inona no ambaran'ny fo fa ny toetrantsika, ny maha-isika antsika.

Marina ilaina ny ety ivelany maneho ny ao anatin'ny fa ny ao anatin'ny no ilaina hiova.

Apetraky ny evanjely amin'izao fanombohan'ny karemy izao ny programantsika hanehoana izany fihavaozan'ny fontsika izany ka hahatonga antsika ho Eglizy Olona Velona. Hararaoty izao fotoana izao, izany no ambaran'i Md Paoly amintsika, *"Izao no andro tsara, izao no fotoana tsara, mihavana re amin'Andriamanitra"*. Olombelona isika ka mila famantarana ka ny sakramenta no manampy antsika hiaina izany. Anaovana antso avo isika mba hirosoantsika amin'ny sakramentan'ny fampihavanana. Mivelona ny sakramentan'ny fampihavanana isika raha miverina amin'Andriamanitra ka ambarantsika amin'ny fiainana, hihavana amin'ny tontolom-piainantsika isika ka tsy hamotika ny zava-boahary fa hikolokolo amin'ny alalan'ny fambolon-kazo.

Mihavana re amin'Andriamanitra izay midika isika mihavana amin'ny mpiara-belona ka manorina tontolom-piainana anjakan'ny rariny sy ny hitsiny amin'ny alalan'ny fifamelan-keloka sy ny fifamindram-po ka miaina ny marina mba hialana amin'ny risoriso sy ny henamaso ary ny fihatsaram-belatsihy fa hampanjaka ny fahamarinana isika ka hanorina ny fanjakan'Andriamanitra eo anivon'ny fiaraha-monina, ny fianakaviana sy ny fiainantsika andavanandro.

Rehefa mihavana amin'Andriamanitra sy amin'ny mpiara-belona dia miezaka ihany koa mihavana amin'ny tontolo iainana araka ny hafatry ny Papa amin'izao karemy 2025 izao. Mifanaraka tsara amin'ny ezaky ny diosezy maintso eto amin'ny diosezy. Miala amin'ny herisetra manapotika ny manodidina isika fa indrindra ireny motro manapotika ny ala ireny fa miezaka miaro izay ala kely sisa ankehitriny entina manorina ny ho avy. Miomana amin'ny Fankalazana ny Paka isika raha manatanteraka izany. Manambara fa niova tokoa ny fontsika. Tsarovy fa izay mandoro ala mamono taranaka fa izay mamboly hazo manome aina. Io aina io tokoa no ankalazaintsika amin'ny Paka. Misy akony manokana izany amin'izao taon-jobiln'ny famonjena izao.

Mirary karemy hitondra antsika amin'ny fiombonana amin'Andriamanitra ka hahatonga antsika ho génération mpanorina tokoa isika, hanavaozantsika ny fontsika, fo misy an'Andriamanitra, fo mamela heloka ary hanana fiombonana tanteraka amin'Andriamanitra anie isika. Mitodika amin'I Masina Maria isika. Izy anie hampianatra antsika hahay hampifanojo ny vavaka sy ny fibebahana ary ny asan'ny famindrampo . Md Josefa, Ray mpiaron'ny Eglizy erantany ianao, mivavahà ho an'ny fianakaviana , *"eglizy kely"* mba hahay hanararaotra izao vanim-potoan'ny Karemy izao, hametraka an'Andriamanitra eo anivon'ny fiainana ka hazoto hivavaka sy haneho asa fitiavana namana.

Mompera Arseveka Mgr Benjamin Ramarason